



Alþýðusamband Íslands

Tillaga að ályktun 41. þings ASÍ

Öflug verkalýðshreyfing á brýnt erindi við samfélagið

Frá upphafi hefur verkefni íslenskrar verkalýðshreyfingar verið að tryggja launafólki mannsæmandi laun og önnur starfskjör. Jafnframt að skapa samfélag jafnréttis og jafnra tækifæra þar sem allir búa við góð og eftirsóknarverð lífskjör. Þetta hlutverk hefur ekkert breyst, þótt samfélagið hafi tekið stórstígam framförum og kjör fólks og allar aðstæður þar með. Verkalýðshreyfingin gegnir lykilhlutverki í þessari uppbyggingu og hefur náð miklum árangri á mörgum sviðum. Ljóst er að launafólk og samtök þess standa í dag frammi fyrir áskorunum, þar sem framvinda mála mun ráða miklu um hag og velferð launafólks í framtíðinni.

Alþýðusambandið hefur skýra framtíðarsýn og setur sér langtímamarkmið með hagsmuni launafólks að leiðarljósi. Til að ná markmiðum sínum mun verkalýðshreyfingin beita sér af festu fyrir þeim samfélagsmálum sem varða launafólk og hagsmuni þess. Öflugt velferðarkerfi, góð heilbrigðisþjónusta, menntun fyrir alla og húsnæðisöryggi. Samfélag fyrir alla.

Til að ná árangri verða Alþýðusambandið og aðildarsamtök þess að vera vel sýnileg í þjóðfélagsumræðunni. Markviss upplýsingastarfsemi kemur málflutningi verkalýðshreyfingarinnar og áherslum á framfæri með skýrum hætti á máli sem fólk skilur. Til þess notum við ólíka miðla og aðferðir sem höfða til allra. Leggja ber áherslu á að ná til unga fólksins í skólum, með jafningjafræðslu, kynna því verkalýðshreyfinguna og fyrir hvað hún stendur.

Alþýðusambandið og aðildarsamtök þess eiga að setja skoðanir sínar og sjónarmið fram af festu, vera gagnrýnin en halda einnig á lofti árangri af starfi sínu og sigrum í baráttunni. Trúverðugleiki í málflutningi og árangur byggir á að forystumenn launafólks sýni samstöðu og leggi áherslu á það sem sameinar okkur.

Mikilvæg forsenda árangurs af starfi verkalýðshreyfingarinnar er öflug heildarsamtök þar sem aðildarfélög sameina kraftana. Alþýðusamband Íslands eru fjölmennustu samtök landsins, byggð á lýðræðislegum grunni, með meira en 100.000 félagsmenn úr öllum greinum atvinnulífsins, alls staðar af landinu. Í Alþýðusambandinu er jafnframt öflug sveit forystufólks sem leiðir starf félaganna. Mikilvægt er að forysta Alþýðusambandsins endurspegli þennan fjölbreytileika og að öllum sé ljóst það afl sem í því felst. Stéttarfélagin eru grunneining verkalýðshreyfingarinnar og þangað sækir ASÍ styrk sinn. Jafnframt er mikilvægt að

aðildarfélögin hafi samvinnu og samstarf sín á milli til að tryggja sem best þjónustu við félagsmennina og þeirra félagslegu réttindi.

Í stórum heildarsamtökum eins og Alþýðusambandinu er mikilvægt að virða ólíkar skoðanir og fjölbreytileika. Þegar sameiginleg niðurstaða liggur fyrir, er brýnt að félagsmenn fylki sér á bak við hana.

Innra starf stéttarfélaganna ræður miklu um árangur af starfi þeirra. Öflugt og virkt trúnaðarmannakerfi og trúnaðarmenn á vinnustað eru mikilvægur grunnur undir starf stéttarfélaganna. Trúnaðarmenn gera stéttarfélögin og starf þeirra sýnilegra á vinnustaðnum. Trúnaðarmaðurinn á að gegna lykilhlutverki við móttöku nýrra starfsmanna, myndar tengsl á milli félagsmanna og stéttarfélagsins. Hér gildir að ná til allra félagsmanna ekki síst unga fólksins sem er að stíga sín fyrstu skref á vinnumarkaði svo og erlendra starfsmanna, „komdu á trú nó“.

Starf trúnaðarmannsins er mikilvægt en jafnframt vandasamt. Öflug fræðsla og upplýsingagjöf til trúnaðarmanna er nauðsynleg til að styðja þá og styrkja í starfi. Þá er mikilvægt að trúnaðarmenn finni að stéttarfélögin meti störf þeirra að verðleikum og sýni það í verki. Verkefni Alþýðusambandsins og aðildarfélaganna er jafnframt að sjá til þess að atvinnurekendur þekki og virði réttindi og starf trúnaðarmannsins á vinnustað og hafi skilning á mikilvægu hlutverki hans.

Stéttarfélagunum ber að leggja áherslu á að forystumenn þeirra heimsæki vinnustaði og haldi vinnustaðafundi ekki síst þar sem ekki eru trúnaðarmenn. Einnig er mikilvægt að efla starfsmenn stéttarfélagann til að þeir geti veitt félagsmönnum sem bestan stuðning og þjónustu. Þá eiga félögin að nýta lög og samninga um vinnustaðaeftirlit til að miðla upplýsingum til félagsmanna og ganga úr skugga um að þeir njóti þeirra kjara og réttinda sem þeim ber. Skilaboð Alþýðusambandsins og aðildarfélaganna eru skýr: „Við komum til félagsmannanna og styðjum þá þar sem þeir eru“ og „Við erum til fyrir þig“.

Árangur af starfi Alþýðusambandsins og aðildarsamtaka þess ræðst ekki síst af því hvort við erum tilbúin að nota samtakamáttinn til að ná markmiðum okkar. Sama gildir gagnvart atvinnurekendum og stjórnvöldum brjóti þeir sátt og samninga. Verkalýðshreyfingin verður að vera reiðubúin að sýna vopnin og beita þeim óhikað félagsmönnum til hagsbóta.